

La Lettre Jèrriaise pour Sanm'di, lé 13 du mais d'Août, 2022

Bouanjour bouonnes gens. Ch'est Françouais L' Maistre tch'a l'pliaïsi dé vos présenter la Lettre Jèrriaise à matîn, Sanm'di, lé 13 du mais d'Août 2022. Assa, éyou c'menchi auve toute chutte chaleu-chîn, ches jours? Eune vraie arSION! Chutte semaine, la tempéthatuthe à méjeu en d'avant des offices du National Trust ès Elms, 'tait déjà 34C dégrés au solé!! Et pis, Jeudi siez nous, la tempéthatuthe 'tait déjà à 22C à neuf heuthes du matîn à l'ombre!!

La s'crèche continnue quédaine et la moindre quantité d'plyie enregistrée au mais d'Juillet {un quart d'un pouce} à tout janmais. Nou vait les pliantes et les flieurs dans l'gardîn pendre la tête et à d'mander d'être arrôses. Nou n'a pon veu chenna pour quâsi chînqante ans, d'pis la grand' s'crèche dans l'été dé 1976. Ch' n'est qué d'la possiéthe dans les clios. J'n' allons pon aver grand' récolte dans les lédgeunmes si chennechîn continnue. Nou sé d'mande si lé nouveau Gouvèrnement s'en vont faithe grand progrès auve lus grandes idées pour lus d'menter du changement d'clyînmat par tout l'monde. Nou pouorrait faithe tant d'choses pour aidgi au peupl'ye à lus combattre contre difféthentes choses, mais v'la tchi s'en va couôter chi pour l'Île. D's idées comme changi toutes les beusses à être êlectriques s'en va couôter eune forteune pour nouot' Compangnie d'Beusses, et v'la tchi prendra du temps à payi touos les frais auve tout chu changement-là. I' n' y a autcheune doute qué j'allons être oblyigis d'faithe un tas d'changements avau l's années pour dînminuer l's êffets du changement d'clyînmat, inclus la viag'gie qué j'faithons tous par avion. Au mais d'Juîn, j'tais iun dé ches-là quand j'fus ès neuches à ma p'tite fil'ye, Dominique, en Angliétèrre. Nou-s-est v'nu à faithe ches viages-'chîn sans y penser, et j'tais p't-êtré iun des piéthes quand j'allais en Australie et la Nouvelle Zélande touos l's ans! Mais comment faithe autrément? Nou-'s aime bein visiter nous membres dé fanmil'ye dé temps en temps!

Enfin, j'eûnmes un bouan temps ès neuches et du bieu solé pour toute la journée. Mais, en r'touônnant en Jèrri, not' avion fut èrtèrgie pour deux heuthes un quart pour changi eune cliavette tchi coulait, dans l'engîn!! J'feûnmes oblyigis dé rester assis tout chu temps-là dans l'avion! Tchi mînséthe pour bein du monde auve lus p'tchiots à plieuther et à vrénoter dans lus siège. Deux'-trais des pathents amnitent lus p'tchiots pour rencontrer les pilotes dans lus cabannes et lé pilote nous fit a saver dé tout chein tchi s'passait.

Mais, n'en v'la assez dé ma bagoul'lie pour aniet. Ayiz tous eune bouanne semaine et i' faut espéther pour d'la plyie bein vite.

À bi.